

## Age Yone Neala olelo oboba

Yone eda Yesuie damelë. Eda Yesu bégëla aulo dolö giwilasi amogi. Hobeafali ëdëi sali hamosalea ea ado go dëdëla Geleso sosogo nefolalo amolima i. Dëdëla i amoie mida gowe. Godea nili boba hamoi amo gadola, amase, niliage udia dolö odoa boba hamomalola säla dëdëi. Amase, ea elö sähalea, Wäfali säsäla olelelo moholömelë. Hedabola beaha namialola säla dëdëi. Iliä sähalea, Godeie malöda dolö namolö misi mademelëla sämolömelëla Yonea beba gowe dëdëi. Ado Mala Hedabi Yone dëdëi amoge Yone eamu dëdëimelë.

### *Namolöi namolö Ado e ulufadigila misi*

<sup>1</sup> Nelebo sulubadela maadeia, nelo misi amoie ado nilia nabala, siia beala, naaboea diigilahilä, nilia dilima namolöi namolö Ado e misi amoie säla iahago. <sup>2</sup> Namolö dofä ulufadigi amo bealahilä, nilia meli amo dilima säha. Namolöi namolö e siiba Eedobalä nelo ulufadigila misi amoie säla iahago. <sup>3</sup> Dilia nilibalä dila namiäia nilia meli nabi amole dilima säla iahago. Eedo, ie Efege Yesu Gelesolebalä nilia dila neamelë. <sup>4</sup> Dilimage nilimage obeägilo nobamäia nilia dilima beba dëdëla iasisago.

### *Gode e yo digalo neebe*

<sup>5</sup> Ea ado säi amo nilia nabalahlilä, dilima säla iahago. Gode eda yo digalo nea, gasimi sagalo gadoi nafade ema madefalimelë. <sup>6</sup> Nilia ebalä dila neala säha nea, gasimi sagalo gadoi nafademu

hamosa aligiseda, wāfali sālo nea, dofā sālo made gaula neamelē. <sup>7</sup> E nafade baai made, yo digalo neebe amo gadola nili nafade baai made, yo digalomadi nawesa aligiseda, odoa neebe amolibalā dila neage, ie malō Yesuie healea nafade hamoi amo sulubadela hēsage neamelē. <sup>8</sup> Nilia sähalea, Na nafade hamolo madela säседа, nili nihili gadiabola sāha, dofā sālo nilile isogi made neamelē. <sup>9</sup> Amai gaso, nilia nafade hamoi amo sāla sisiaseda, Gode mogoi nea hēmolōmelēla sāi amo gadola hēmolōmelē. Nilia mala nafade hamoi amoge sulubadela hēsa maademolōmelē. <sup>10</sup> Nilia sähalea, Na nafade hamoi madela säседа, Gode eda wāfali sālo neala sāloge, ie adoge nilima mademelē.

## 2

### *Gelesoda nilile ugila negelo neebe*

<sup>1</sup> Nie malōla dilie, nafade made hamomāia na dilima beba gowe dēdēla iasisago. Gasoda, nili afādēa nafade afādē hamoseda, nilile Ugila Negelo Eedobalā nea, Yesu Geleso e asigi mogoi neebe amo neamelē. <sup>2</sup> Nilile nafade hamoi amo hēmāia ea hile namolō amo odala iala baagoi. Nililemu hēmāia made, udia dolō sulubadelaie nafade hamoi amo hēmāia amala hamoi.

### *Gode dawadigi neebe ameada ie mala bēgēla hamosa neala sāi*

<sup>3</sup> Amaimo, nilia ea sāi dibe amo gadola hamosamu aligiseda, nilia e dawadigila helēsēsamelē. <sup>4</sup> Afādēa ea sāi amo gadola made hamosa nea sähalea, E dawadigila säседа, eda wāfali sālo nea, dofā sālo ema mademelē. <sup>5</sup> Afādēa ea sāi dibe amo gadola hamoseda, Godema boba

hamolo amo dofä fädäi neamelë. Nili ebalä dila neada gomalä helësedelä. <sup>6</sup> Afädëa ebalä dila neala säседа, Yesuea hamosa nelo amo gadola hamosa namolöi galea. <sup>7</sup> Nie damelë obeägilola dilie, na dilima hamomalola säla negei amo dödëla äisise amoda hädamade negei made, siiba negei.\* Amoda mi gäwia amila dilo. Siiba negeila säi amo dilia nabaha maadei. <sup>8</sup> Amai gaso, hamomalola säla negei amo dödëla äisisebegoda gähemelë. Gelesoie namolöea hamoi amoge dilile namolöea hamoi amoge dofä gabula melëlo. Mida, gasimi sagalo amoda usila, yo digalo dofä amoda yo digaha neamelë. <sup>9</sup> Afädëa ie edooma bimolö habobala nea ea sähalea, Yo digalo neebee ami neala säседа, gasimi sagaia ami neamelë. <sup>10</sup> Afädëa ie edooma boba hamosa neebe amoda yo digalomadi nea. İe isogi yo digalo neebe ameada nelebo afädëa e digalasimolöi mademelë. <sup>11</sup> Amai gasoda, afädëa ie edooma bimolö habobala nea galëda, gasimi sagaigi nea. Ami nawesa nea. Gasimi sagaloea İe si dofogasegi, idi gowegi awähala helësëla made, nagubaia nawesa nea.

<sup>12</sup> Malöla dilie, dilile nafade hamoi amo Gelesoie äigi hëla fisi amoie na dilima dödëla äihago.

<sup>13</sup> Asigi fädäi nadola dilie, Afädë siibafalï siiba neamu nelo dilia dawadigi amoie na dilima dödëla äihago.

Malisäfalie, dilia nafadelasiloie busa neebe amo nufuda salala salolela asi amoie na dilima dödëla äihago.

---

\* **2:7:** 2.7 Yone 13.34 gomalä säla dödëla negei dialea. Yesuea sähalea, Na dili boba hamoi amo gadola dilia dihilimu boba hamomala namialola säla dödëla negei dialea.

14 Malöla dilie, dilile Diado neebe amo dawadigi amoie na dilima dödëla iahago.

Asigi fädäi nadola dilie, Afädë siibafali siiba neamu nelo dilia dawadigi amoie na dilima dödëla iahago.

Malisäfalie, dilia geloi amoiege, Godeie ado dilile isogi dibe amoiege, nafadelasiloie busa neebe amo nufuda salala salolela asi amoiege na dilima dödëla iahago.

### *Nagadaia galu boba hamomabiola säi*

15 Nagadaia galu amole nelebo nagadaia dibe amole boba hamola namiabio. Afädëa nagadaia galu dibe amo boba hamoseda, Nadoma boba hamolo amo ema mademelë. 16 Nagadaia dibe amo sulubadela Nadomadila mulo made. Amoda gowe. Domaloea gelola hamelo amoge, siia beala gelola hamelo amoge, afädëa nelegei yafie negelo ameage hamoi hamolo ameage gugusäla bimäia hamolo. Amo sulubadela Nadomadila mulo made, nagadaia amila mulomelë. 17 Naga föige nagadaia hamelo amoge hogosa helesalea gaso, udia dolöea Godea hamese amo gadola hamolo amoli namolöi namolömelë.

### *Gelesoie ado nii misi neebe*

18 Nie malöla dilie, nilida hä segeyo aligila wagamolö fumadi neamelë. Dilia dafidi Gelesoie ado nii moholömelëla säi nabi amo walioda hä odoa Gelesoie ado nii malei misi neamelë. Ameada nilida hä aligila wagamolö fumadi nea gabula helësedelä. 19 Ili nili digila bahila doadigila afi-aha maadei. Amolia nilibalä dila made nelo. Dofä dila nelo galebada nili gedola afädëfali neëgi, amalabio. Ili afiaha maadei amea ili sulubadela

nilibalä dila made nelo amo oleimelë. <sup>20</sup> Amai gaso, dilima Gelesoea Godeie Gesami i. Dili sulubadelaea dofä sälo dawadigi nebego. <sup>21</sup> Dilia ado dofä amo dawadigi madela helësëla dëdësa maade. Dilia ado dofä amo dawadigi ameage wäfalä sälo amo ado dofä amila mulo made amo dawadigi ameage na dilima dëdëla iasisago. <sup>22</sup> Wäfalä sälo amoda nowë. Eada sähalea, Afädë Memeleida Yesu madela sälomelë. Efegele Eedolema baagi ilo amoda Gelesoie ado niimelë. <sup>23</sup> Efegema baagi ilo amobalä eedoda nea mademelë. Efegema asigi afädë negelo neebe amobaläda eedo neamelë.

### *Ado dofä Gesami Hedabia olelesa neebe*

<sup>24</sup> Mi gäwia amila nabi dilile isogi dibe amo amalasi namialo. Amalasi aligiseda, dili Efegele Eedolebalä namolömelë. <sup>25</sup> Ea niligali imolöla daii amoda gowe. Namolöi namolö imolöla daii. <sup>26</sup> Iliä dili dahila nimolö helësësa neebe amoie na dilima beba dëdëla iahago. <sup>27</sup> Amai gaso, dilima Gelesoea Godeie Gesami i amo nea. Ameada afädëa dili olelemolöi made. Gesamia nelebo sulubadela dili olelesaleada wäfalä made, dofä sälo nea. Dilima olelei amo gadola, Gelesobalä dila namialo.

### *Nili Godeie malö neebe*

<sup>28</sup> Amai gabugi, nïe malöla dilie, hi e ulufadigisolo amo gala ie siigi nili hewaloea bedäla made gelola namolöie ebalä dila namialo. <sup>29</sup> Amai dilia eda mogoifali neebe amo helësësebe amea gomalä helësëmalo. Sulubadelaea mala mogoi hamosa neebe amolida Godeie malölali nefolaleala helësëmalo.

### 3

<sup>1</sup> Wae, Nado Godea nilīma sähalea, Dili nīe malölali nebegola säla abodo gadola boba hamosa neadu. Dofä gelola nilīda iē malölali neebe amo. Nagadaia nafade hamolo neebe amolia Nado dawa made neebe amea nilige dawa made nea. <sup>2</sup> Nīe damelē obeägīlola dilie, nilī walio Godeie malölali neebe amo hobeia nilī abodo gadoi namolödu dawa made nea gaso, nilīa afädēfali helēsēsebe amoda gowe. Geleso ulufadigisolō amo gala e abodo gadoi maase bimolödu, amo nilīa siia beahalea, e neebe amo gadoi namolö gabula helēsēsamelē. <sup>3</sup> Ea nilī hī e gadoi namolö gabula sulubadelaea asigia sisiläfüsa nefolalebe amolida nigime baai made, hī e nigime baai made neebe amo gadoi namolö gabula hehelēsēsa neamelē.

<sup>4</sup> Nafademu hamolo nefolalebe amoli sulubadelaeada Godeie ado säla negei dibe amo neadigilo nea. Mala nafade dibe amea iē ado säla negei dibe amo neadigilomelē. <sup>5</sup> Nafade hēla fisimolöie e ulufadigila misi amoge ema nafade afädē baai made amoge dilia dawadigi. <sup>6</sup> Amaimo, afädē ebalā dila neebe ameada nafade hamosamu aligilo mademelē. Afädēa nafade hamosamu neebe ameada e made beagolei, e dawa made nea. <sup>7</sup> Nīe malöla dilie, afädēa dili dahila neloea idihē namialo. E asigi mogoi neebe amo gadola afädēa mala mogoi hamolo neebe amoge asigi mogoi nea. <sup>8</sup> Siiba mi gäwilafali mugabe busaeada nafademu hamosa nelo. Amo gadola afädēa nafademu hamolo neebe amoge e sosogo nea. Ea nafademu hamosa nebegi, Godeie Malöea mugabe busaea hamoi amo hailadigimolöie ulufadigila

misi. <sup>9</sup> Amaimo, afädë Godeie malö neebe ameadā nafade hamosamu aligilo made nea. Amoie mida, ie namolöie gägä negela hi e gadoi bedefai nea. E Godeie malö neebe amea nafade hamosamu namolö uli nea. <sup>10</sup> Amo helësëlahilä, Godeie malö neebe amoge mugabe busaie malö neebe amoge nowëie walebelela mogela melëlomelë. Mala mogoi hamolo made neebe amoda Godeie malö made nea. Amase, ie edooma boba hamolo made neebe amoge Godeie malö made neamelë.

<sup>11</sup> Mi gäwia amila ado säla i nilia nabi amoda gowe. Nilia nihilimu boba hamosa nami-alola säla i. <sup>12</sup> Nafadelasiloie busaie sosogo nelo Geinia ie ëo baagomäia nufi. Nili e gadoi nami-abio. Nufi amoda mi edogi. Mida, ie ëoea hedabimu hamosa nebegida, Geiniada nafademu hamosa nelo. <sup>13</sup> Amaimo, nie nedoola dilie, nagadaia nafade hamolo neebe amolia dilima bimolö habobaseda, fudugimabio. <sup>14</sup> Nilia nilile nedoo nefolalebe amolibalä boba hamosa neebe amea nilia helësësaleda, nilida baagomolö dibeā amila namolöi namolömadi dëgëla asi nefolaleala helësësa. Afädëa boba made hamoseda, eda baagomolö dibeā ami nea. <sup>15</sup> Afädëa hile edooma bimolö habobaha neebe amoda udia dolö baagomäia nufidelo nea. Baagomäia nufidelo neebe amolia namolöi namolö gaula made neebe amoda dilia dawadigi. <sup>16</sup> Gelesoea hile namolö amo niligali fisiga gala i amea, nilia boba hamolo amo helësësa nea. Amai gabugi, niliage nilile nedoo nefolalebe amoligali nilile namolö amo fisiga gala imolöla. <sup>17</sup> Afädë nelegei negelo neebe amea ie edoo nelebo maade neebe amo bealahilä made bobasësa,

Godeie boba hamolo amo ebalä abeahäla neadu. <sup>18</sup> Nie malöla dilie, nilia adoeamu boba hamolo gadoi namiabio. Dofä hamoi hamosa nea boba hamola namialo.

### *Godeie siigi neebe amea gelola namolö*

<sup>19-20</sup> Amala hamolo amea nilida dofä säloie sosogo neala helësëmolömelë. Nafade hamosebe amoie së molö dialeala iso asigigi säla iaseda, ie siigi asigi sigi namialo. Mida, Godea nilile iso asigi baagila awäla, ea sulubadela dawadigi amea amala sigi namolöla. <sup>21</sup> Nie damelë obeägilola dilie, nilile iso asigigi së molö dialeala made säla iaseda, ie siigi bedäi made gelola neamelë. <sup>22</sup> Elöda, nilia ea hamomalola säi amo gadola hamosebe ameage, e obeägimäia hamosebe ameage nilia ema afädë nabaseda, ea imolömelë. <sup>23</sup> Godea hamomalola säi amoda gowe. Nilia ie malö Yesu Gelesoie äigi asigi afädë negela nea, nihilimu boba hahamosa namolöla. Ea amala hamomalola säi. <sup>24</sup> Amaimo, afädëa ea hamomalola säi amo gadola bögëla hamoseda, eda Godebalä dila nea. Amase, eege dolö amoliberalä dila neamelë. Godea ie Gesami niligali i ameada nili Godebalä dila neala helësësamelë.

## 4

### *Dofä sälo Gesamile wäfalä sälo gesamile moge-molö*

<sup>1</sup> Nie damelë obeägilola dilie, wäfalä bea sälo yafie amoli sege sulubadelagi nawesa nea. Amai odoaea Gesami nema neala säседа, sulubadelaea dofä säsebelä helësëmabio. Ili Godemadila walebelela bimolöie fedogola bimalo. <sup>2</sup> Ilima

Godeie Gesami neebelela fädäla bimolö amoda gowe. Afädëa sähalea, Yesu Geleso eda dofä dolö domalola digaila säha neebe amomada Godeie Gesami nea. <sup>3</sup> Amaimo, afädëa sähalea, Yesu amala made digaila säha neebe amomada Godeie Gesami nea mademelë. Mala amoda Gelesoie ado niimadila misi dialea. Dafidi mala amo moholömelëla säi dilia nabi amoda walio hä nagadaia misi dialea. <sup>4</sup> Nie malöla dilie, dilida Godeie malö nea. Wäfalí bea sälo neebe amoli nufuda salalahilä salolela baagila asi nebego. Mida, dilibalä dila neebe ameada nagadaia nafade hamolo amolibalä dila neebe amoda baagila asi neamelë. <sup>5</sup> Amolida nagadaia dolö neebe amea ilia nagadaia galu säha neebe amoda nagadaia nafade hamolo amolia nabelo nea. <sup>6</sup> Amaimo, nilí Godeie sosogo nefolalea. Ado nilia säsolo amo gala udia dolöea Gode dawadigi nefolalebe amolia nilile ado nabelo nea. Amai gaso, udia dolö Godeie sosogo made nefolalebe amolia nilile ado nabelo made neamelë. Amo gadola dofä sälo Gesamige wäfalí sälo gesamige mogemolöi galea.

*Dolö afädëa Gode boba hamoi neebe ameada odoage boba hamomalola säi*

<sup>7</sup> Nie damelë obeägilola dilie, boba hamolo amoda Godemadila mulo amea nilia nihilimu boba hahamosa namolöla. Afädëa odoa neebe amo boba hamosa neebe amoda Godeie malö nea, ea Gode dawadigi nea. <sup>8</sup> Amaimo, afädëa odoa boba made hamosa neebe amoda Gode dawadigi made nea. Mida, Gode eda boba hamolo nea. <sup>9</sup> Godea ie Efege afädëfalí amo nagadaia digamalai. Ea amala hamoi amea nilí namolöi namiäia amai.

Amala digamalai ameadā Godea nili boba hamosa neebe amo olei. <sup>10</sup> Boba hamolo amoie mida gowe. Nilia edale boba hamoi made, eadale nili boba hamolahilā, nilia nafade hamoi amo hēmāia ie malōea hile namolō amo odala iala baagomāia e digamalai.

<sup>11</sup> Nīe damelē obeāgilola dilie, Godea nili amala boba hamoi amea nilia nihilimu boba hamosa namolōla. <sup>12</sup> Afādēa Gode made meli nea gaso, nili nihilimu boba hamosa aligiseda, Gode eege nilibalā dila nea, nilile isogi ie boba hamolo amea hamese amo gadola hamosage neamelē. <sup>13</sup> Amaimo, Godea ie Gesami niligali i amea nilia ema dila neebe amoge, amase, ea nilima dila neebe amoge nilia dawadigimelē. <sup>14</sup> Nadoea ie malō nili sege fōi sulubadelagi neebe amo sulubadelagali damula aulo namiāia fisiga idai. Fisiga idai amo nilia siia bealahilā, ulufadigila sāla iahago. <sup>15</sup> Afādēa Yesu eda Godeie Efege neala sāla ulufadigiseda, Godeda ebalā dila nea, amase, eege Godebalā dila neamelē. <sup>16</sup> Amaimo, Godea nili dofā boba hamosa neala nilia dawadigi nea. Gode eda boba hamolo nea. Afādēa boba hamosa aligiseda, e Godebalā dila nea, amase, Godege ebalā dila neamelē.

<sup>17</sup> Nilia amala aligiseda, nilile isogi ie boba hamolo amea hamese amo gadola hamosa nea. Amala hamosa neebe amea, nili nagadaia nea hī e gadoi aligilo amea, aligila wagala gudisolo amo gala nili bedāmolō made, geloi namolōmelē. <sup>18</sup> Afādēa boba hamomolōge bedāmolōge balagula gaula namolōi mademelē. Boba hamolo dofā fādāi amea bedālo amo nesiladigilo. Mida, sē

molömadi neebe amea bedälo. Afädë bedälo neebe amoda Godeie boba hamolo amea hamese amo gadola made hamosa neamelë. <sup>19</sup> Godea dafidi nilidale boba hamoi amea nilia boba hamosa nea. <sup>20</sup> Afädëa ie edooma bimolö habobaha nea sähalea, Na Godema boba hamosa neawela säседа, eda wäfalä sälo nea. Ea ie edoo amoli siia bealahilä, ili boba made hamosa nea galëda, Gode made meli neebe amo ea boba hamomolö amo uli nea. <sup>21</sup> Ea nilia hamomalola säla i amoda gowe. Afädëa Godema boba hamosa nea ie edooma boba hamomolöi galeala säi.

## 5

### *Geleso sosogoea nafade sulubadela nufuda salelo neebe*

<sup>1</sup> Afädë Memelei amo dofä Yesu e nealahilä asigi afädë negei neebe amoli sulubadelada Godeie malö nea. Eedo afädë amoma boba hamosa neebe amoli sulubadelaëa ie malö amomage boba hamosa nea. <sup>2</sup> Nilia Gode boba hamolahilä ea hamomalola säla negei dibe amo nabala hamolo amea, nilia Godeie malölali neebe amo boba hamolo neala helësmolö dialea. <sup>3</sup> Mida, Godema boba hamolo amoda gowe. Ea hamomalola säi amo nabala hamolo. Amoda iliawai made, hamomolöi dialea. <sup>4</sup> Mida, Godeie malö nefolalebe amoliada nagadaia nafade hamolo elö elöla dibe amo nufuda salala baagila aulo nea. Yesu Gelesoma asigi afädë negei neebe amea nagadaia nafade hamolo dibe amo nufuda salalahilä baagila asimelë. <sup>5</sup> Nagadaia nafade hamolo dibe amo nufuda salala baagila moholö neebe amoda nowëa. Amoda gowea, Yesu e Godeie malö neala

sälakilä asigi afädë negei neebe ameamu baagila moholöi nea.

*Godea ie malömadila namolöi namolö i*

<sup>6</sup> Ödäeage healeage misi amoda Yesu Geleso\*. Ödäeamu made, ödäeage healeage misi. Gesamia dofä sälo amea dofä amala misi amo säla iaha nea. <sup>7</sup> Ohodoa ilia dofä amala misila säla iaha nea. <sup>8</sup> Gesamige, ödäge, healeage amolile adoda afädëdimu säla iaha nea. <sup>9</sup> Udia dolöea siia meli amo dofä säsebelä asigi afädë negelomelë. Amai gaso, Godeie ado dofä sälo dibe amea udia dolöie ado sälo amo baagila asi dialea. Mida, e Gode nea. Elöda, hile efegëie säsisä nea. <sup>10</sup> Amala säla i amo, afädëa Godeie malöma asigi afädë negei neebe amoie isogi ie malöea hamoi Eedoea säsisä neebe amo neala gaula nea. Amai gaso, elöea Godema asigi afädë made negei nea, Gode eda wäfalä sälo neala helësëlo nea. Mida gowe. Ie malöea hamoi säla i amo dofä gabula asigi afädë made negei amea. <sup>11</sup> Amaimo, ado säla i amoda gowe. Godea niligali namolöi namolö i. Ie malömadila namolöi namolö amo i. <sup>12</sup> Afädëa ie malöma dila neebe ameada namolöi namolö amo gaula nea. Afädëa ie malöma dila made neebe ameada namolöi namolö amo made gaula nea. <sup>13</sup> Godeie malöie ëigi asigi afädë negei nefolalebela dilie, dilia namolöi namolö gaula nebeگو dawadigimäia, na dilima ado gowe dëdëla iasisago. <sup>14</sup> Nilia Godea helësëi dibe amo gadola ema adosa

---

\* **5:6:** 5.6 Giligi adogida ulufadigila dëdëi made, ödä heale elemu säi. Dawadigi odoä neebe amoliada, ödäla säi amoda Yesu ödägi gei amo helësëi. Healela säi amoda Yesu baagoi amo helësëi.

nea, nilia afädë nabaseda, ea nilia säi amo gadoi ïmolömelë. Ameada nili ie siigi bedäla made gelola neamelë. <sup>15</sup> Nilia ema ado afädë nabasegi, ea nabalö gabula dawadigi nefolalebe amea ema nabi amo ïmolö gabula dawadigi nefolalea. <sup>16</sup> Afädëa ie edooea nafade hamosa neë beaseda, nafade amo gadoi hamose ameada baagomolöi made galëda, Godema nabaseda, Godea ema namolö ïmolömelë. Amo säsebe amoda, nafade ameada ili baagomolöie made säha nea. Amaimo, na gomalä säha, nafade hamose ameada baagolo dialea. Nafade amoie dilia adolasimalola säha maade. <sup>17</sup> Asiala hamolo sulubadelada nafademu. Amai gasoda, nafade hamose ameada baagolo made, nafade odoa amo gadoi dialea.

<sup>18</sup> Nilia helësésaleada, afädë Godeie malö neebe ameada nafade hamosamu aligilo made neala helësësa. Mida, Godeie efegea e sigi neëgida, nafadelasilöie busa neebe ameada e diigimolöi made nea. <sup>19</sup> Nilida Godeie malö neebe amoda dawadigi. Nafadelasilöie busa amea nafade hamolo neebe amoli sulubadela beaha neebe amoge nilia dawadigi. <sup>20</sup> Godeie malö nagadaia digai amo nilia dawadigi nea. Nilia Gode dofä neebe amo dawadigimäia ea dawadigilo amo niligali i. Nilia dofä Gode neebe amoma dila, ie malö Yesu Gelesomage dila nefolalea. Gode eda dofä nea. Namolöi namolö amoda hi e gelola nea. <sup>21</sup> Nie malöla dilie, wäfalä sälo gode neebe amo helësëlahilä, gasi gala sigola namialo. Hä amo.

**Edolo Bible**  
**Ruth, Matthew, Mark, Acts, 1 & 2 Timothy, Titus,**  
**and John's Letters in the Edolo Language of Papua**  
**New Guinea**  
**Sampela hap Buk Baibel long tokples Edolo long**  
**Niugini**

copyright © 2010-2012 Wycliffe Bible Translators, Inc.

Language: Edolo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 11 Nov 2022 from source files dated 4 Oct 2022

688323a7-0b01-555d-b52f-07c624ea681b